

Red Democratico

Gobernador di Aruba a actua moralmente corecto, segun Red Democratico

ORANJESTAD - Ta importante pa haci e distincion entre ley y husticia, tin biaha obedece ley ke men comete un acto di inhusticia. Nelson Mandela a siña humanidad e distincion aki, e a desobedece ley di apartheid di Sur Africa pa por practica husticia.

P'esey Red Democratico ta sigui sostene Gobernador di Aruba den su actuacion rond di e presupuesto di Pais Aru-

ba 2014. E a actua moralmente corecto, aunke e procedura huridicamente no tabata 'nечи'. Su actuacion tabata un grito di auxilio, gritando cu tin mal maneho financiero na Aruba, tin mal gobernacion, cu e debe nacional no ta sostenibel, por favor yuda pasobra Parlamento no ta haci su trabao di control.

P'esey for di un inicio nos a bisa cu mester a bin un Algemeen Maatregel van Rijksbestuur, pasobra articulo 43 di

nos Statuut ta den wega. Ora organonan di un di e paisnan den Reino ya no ta funciona, mester bin intervencion di Reino segun art. 43. Y ta precisamente esey ta e caso na Aruba: e organo mas halto di nos Pais no ta funciona, e ta un stempel parlamento pa hopi tempo caba.

E rapportnan cu a bin despues di CFT ta muestra cu parlamento a faya barbaramente, nan a apoya repentinamente presupuesto cu no tin ni pia

ni cabes. Red Democratico a apoya e CFT, nos a apoya CAFT y nos ta sigui apoya e organo di control externo aki, y den nos interpretacion conehonan di CAFT ta obligatorio.

P'esey Red Democratico ta bisa cu Gobernador Fredis Refunjol a actua moralmente corecto. Y e mas di 10 mil ciudadano, bao guia di Miriam Rosel-Koolman, cu pa medio di nan firma a sostene e gobernador, tambe a actua

moralmente corecto. E welga di hamber di Prome Minister tabata pa hustifica mal maneho financiero y mal gobernacion, ke men pa hustifica un mal causa. Si mester scoge entre bon gobernacion of mal gobernacion, Red Democratico ta scoge pa bon gobernacion, nos a haci esey na 2014, y nos ta sigui haci esaki na 2015. P'esey Red Democratico ta expresa palabranan di solidaridad y sosten moral na nos Gobernador, Sr. Fredis Refunjol. □